

阿毗曇毗婆沙論卷第七十六

京五

迦旃陀羅子造

北涼沙門浮陀跋摩共道泰譯

智犍度他心智品第二之二

問曰念前世智爲念曾所更事爲念未曾所更事耶答曰念曾所更事京五問曰若然者則無念生淨居天者所以者何無有曾生淨居天者答曰曾更有二種謂若見若聞淨居天處雖不曾見而得曾聞

問曰爲因欲界生此智耶爲因色界生此智

耶答曰亦因欲界亦因色界或有因欲界作方便於色界得滿足或有因色界作方便於欲界得滿足或有因欲界作方便於欲界得滿足或有因色界作方便於色界得滿足因欲界作方便於色界得滿足者與惡性難共

住衆生同在一處作是思惟如此惡性難共住衆生必是於欲界命終者觀察是時乃是色界命終者因色界作方便於欲界得滿足者與善性易可共住衆生必是色界命終者觀察是時乃是思惟如此善性易可共住衆生必是色界命終者觀察是時乃是欲界命終者觀察是時乃是欲界命終者因欲界作方便於欲界得滿足者與惡性難共住衆生同在一處作是思惟如此惡性難共住衆生必在欲界命終觀察是時是欲界命終者因色界作方便於色界得滿足者與善性易可共住衆生同在一處作是思惟如此善性易可共住衆生必是色界命終者觀察是時是色界命終者

問曰爲觀一一世爲觀多世耶答曰初學時觀一一世滿足時觀百千萬世世尊初學時

則能觀百千萬世問曰爲能捨過百千萬世乃觀久遠百千萬世不耶答曰初學則不能後滿足時則能世尊初學則能捨過百千萬世乃觀久遠百千萬世問曰次第觀前世乃至久遠若欲止時各還次第止耶爲一時止

京五
耶答曰或有說者還次第止評曰應作是說

隨意而觀亦隨意而止問曰次第觀前世經久遠時捨已即能觀未來世耶答曰佛世尊能非餘人所以者何佛世尊觀前世智次第能生觀未來智觀未來智次第能生觀前世智不以方便一切功德悉現前故

問曰於一剎那中能觀幾世耶答曰一世何以知之如毗尼中說尊諸輪毗多作如是說我一發意頃能憶念五百世生事諸比丘皆言應驅逐之所以者何自稱得無有是事過

人法故佛告諸比丘不應驅逐是比丘所以者何是比丘從無想天來生此間無想天壽經五百劫憶念一生事故言五百世

問曰於一時頃能觀幾趣耶答曰或有說者能觀一趣復有說者能觀二趣謂地獄趣畜

生趣或畜生餓鬼趣或畜生天趣或畜生人趣若觀轉輪王時則憶念三趣謂人畜生餓鬼趣人趣者王及臣屬畜生趣者是象馬餓鬼趣者是受祭祀鬼神及轉輪等諸神若觀頂生王時則憶念四趣畜生趣是象馬餓鬼趣是受祭祀神天趣是帝釋及眷屬人趣是頂生及眷屬無有是處以分別故說若令五趣共在一處者亦於一時能憶念五趣

佛經說常見有三種有憶念二萬劫者有憶念四萬劫者有憶念六萬劫者問曰何等常

見憶念二萬劫事何等四萬劫何等六萬劫耶答曰常見者根有上中下下者憶念二萬劫中者四萬劫上者六萬劫復次或有憶念火水風劫者憶念火者二萬劫水者四萬劫風者六萬劫復次或有憶念喜樂捨根壞時憶念喜根壞者二萬劫樂根四萬劫捨根六萬劫復次或是聲聞性或是辟支佛性或是佛性聲聞性者憶念二萬劫辟支佛性者憶念四萬劫佛性者憶念六萬劫

若是他心智盡知他心心數法耶答曰或是他心智不知他心心數法乃至廣作四句是知他心智不知他心心數法者他心智在過去未來有如是相不知他心心數法所以者何過去者所作已竟未來者未有所作是知他心心數法非他心智者猶如有一若以相

知若聞其說若生處得如是智故能知問曰誰能以相知耶答曰人能曾聞跋難陀釋子至一優婆塞家其家門邊繫一駁犢時跋難陀釋子語優婆塞言汝家門邊所繫犢子其色斑駁若以其皮作敷具者好時優婆塞作是思惟是比丘欲得是犢子皮以爲敷具即便殺犢以皮與之時跋難陀釋子持其犢皮往詣祇洹精舍跋難陀釋子見已而語之言善哉居士汝所著衣中作僧伽梨鬱多羅僧安陀會若敷具是時居士作是思惟是比丘欲得我衣即使與之復有說者聞說能知即是以相知經文應如是說若以相知若卜筮知他心心數法以相知者如先說卜筮知者

如諸外道或以指卦或觸衣物若以筭術若逆取相便能知他心心數法誰有生處得知耶答曰地獄衆生然無定名者問曰生處得知爲生時能知中時能知後時能知耶答曰初生未受苦知後受苦時猶不能知自心何況他心爲住善心時能知爲住穢汙無記心時知耶答曰住三種心盡能知爲住意識爲住五識身能知耶答曰住意識知非五識爲住威儀爲住工巧爲住報心耶答曰住威儀心非工巧報心所以者何彼衆生無工巧故非報心報心在五識故畜生中亦有能知他心心數法者曾聞有一女人以兒置一處有緣餘行時有一狼取其兒去時人語言何故取他兒耶狼作是言此兒母常食我子我今還食其子若彼能捨怨心我亦捨之時人語

五
是女人可捨怨心女人答言我今已捨時狼觀女人心不捨其怨而口言捨即殺其兒捨之而去問曰畜生爲生時知爲中時知爲後時知耶答曰三時盡知爲住善心染汙心不隱沒無記心知耶答曰三種盡知爲住意識爲住五識身知耶答曰住意識知非五識身爲住威儀工巧報心知耶答曰三種盡知餓鬼亦知他心心數法曾聞有鬼入一女人身中呪師問之何故觸惱他女人耶彼鬼答言此女人五百世中與我作怨常斷我命我亦斷其命彼若能捨怨心我亦捨之時人語是女人可捨怨心女人答言我今已捨鬼觀女人雖口言捨怨心不除即斷其命捨之而去問曰爲生時知爲中時知爲後時知耶答曰三時盡知爲住善心染汙心不隱沒無記心

知耶答曰三種盡知爲住意識知爲住五識知答曰住意識知爲住威儀工巧報心知耶答曰三種盡知天中亦有生處得知能知他心心數法然無定名初中後知者廣說如畜生餓鬼趣餘廣說如雜捷度是知他心智亦知他心心數法者若智是修是修果從修生得不失此智現在前知欲色界衆生心心數法及無漏心心數法非知他心智非知他心心數法者除上爾所事除上爾所事者廣如先說行陰作此四句此中盡說過去未來現在他心智及現相智聞他說智生得智作前三句餘相應不相應行陰四陰及無爲法作第四句是名除上爾所事若是念前世智盡知前世無數生耶乃至廣作四句是念前世智不知前世無數生者念

前世智在過去未來有念前世智相而不知前世無數生事所以者何過去所作已竟未來未有所作知前世無數生非念前世智者猶如有一有自性念生智者有生處得智者誰有念生智耶答曰人有誰有生處得智耶答曰地獄衆生如經說地獄衆生作如是言沙門婆羅門見貪欲未來過患故爲我等說法應當斷欲我等不用其言以貪欲因緣故今受苦痛果報問曰地獄衆生爲初時知爲中後知耶答曰初時知非中後若未受苦時則知已受苦時次前滅法猶尚不知何況久遠滅者餘廣說如他心智處畜生亦有生處得智如經說汝若是我父都提那者可昇此座廣說如雜捷度問曰爲初時知爲中後知耶答曰初時知中後亦知廣說如他心智處

餓鬼亦有生處得智如偈說

我自聚財物 以法及非法 他今受快樂

而我受苦惱

問曰爲初時知爲中後知耶答曰初中後盡知廣說如他心智處天亦有生處得智如偈

說

京五

七

今此祇陀林 賢聖僧所居 法王亦在中

我心大歡喜

問曰爲初時知爲中後知耶答曰初中後盡知廣說如他心智處問曰人中何故無生處得智耶答曰非其因故廣說如上復次爲念生智所覆蔽故復次人中雖無生處得智而有勝妙念前世智願知是念前世智亦知前世無數生者若智是修是修果從修生得不失以此智念前世無數生有如是相貌非念

前世智亦非念前世無數生者除上爾所事除上爾所事廣說如上此中行陰作四句三世念前世智及現在念生智生處得智作前三句餘相應不相應行陰四陰及無爲法作第四句是名除上爾所事若是念前世智亦知過去他人陰界入及心耶乃至廣作四句初句者是自緣念前世智第二句者是願智方便緣他者第三句者是緣他念前世智第四句者是願智方便自緣者此四句是略毗婆沙是念前世智不知過去他人陰界入及心者若智是修是修果從修生得不失以此智念前世生自陰界入及心是說自緣念前世智知過去他人陰界入及心非念前世智者若智是修乃至廣說以此智知他此生過去陰界入及心是說願智方便緣他身者是

念前世智亦知過去他人陰界入及心者若智是修乃至廣說以此智知前生過去他人陰界入及心是說念前世智緣他者非念前世智亦不知過去他人陰界入及心者若智是修乃至廣說以此智知此生過去自身陰界入及心是說願智方便緣自身者

有自性念生智問曰自性念生智體性是何答曰體性是慧彼心聚中以念力多故名念生智如念處安那般那念除去色相亦如是此是自性念生智體性乃至廣說

已說體性所以今當說何故名自性念生智答曰生而得此智故名自性念生智復次住善心性不善心性無記心性能知故名自性念生智復次過去法更不變故名自性能知此法故名自性念生智

問曰爲作何業得是智耶答曰或有說者常爲衆生說歡喜樂聞語彼業能生如是報復有說者若修治狹小處令使寬博以此業故在母胎中而不迫迮以是業故能生此報復有說者若人以甘美飲食施他彼業得如此報評曰應作是說此是不惱害他業報若衆生不作惱害他業在母胎中則得寬博不爲風熱冷病脂血血所困苦若出胎時亦不爲產門門所逼切以是事故不忘所念一切衆生若於產門不逼切者皆有念前世智以爲產門所逼切故皆失所念問曰念生智爲初時勝爲中後時勝耶答曰或有初中後盡勝者或有初勝者如尸婆羅等初生之時作如是說此家中頗有種種財物及諸穀米可以施於貧窮者不或有中時勝者如頰吒波羅

等或有後時勝者如菴摩羅吒等

問曰念生智爲念幾生耶答曰或有說者念一生復有說念二生乃至七生曾聞王舍城中有屠兒名伽吒是阿闍世王少時親友而語阿闍世言太子汝若登王位時與我作何善事耶阿闍世答言與汝從心所願阿闍世害其父命而登王位時屠兒伽吒往詣王所而白王言大王往日許我所願今正是時王答之言隨意求索時伽吒屠兒便說心願使我於王舍城內獨得屠殺不聽餘人時王語言汝今何用是弊惡願爲更求餘願是時屠兒復語王言善惡諸業悉無果報王語之言何以知之作是說耶屠兒答曰大王當知我自憶念於七世中在王舍城常屠羊自活命終之後生三十三天王聞是語極生疑怪即

以是事而往白佛佛告王言如其所說而無有異此人施辟支佛食發於邪願使我於王舍城中常獨殺羊賣肉以此業故七生人中七生天上今於此身業報已盡却後七日身壞命終當生盧臘地獄以是事故知念生智憶念七世復有說者能念五百世事曾聞有一比丘自念五百世次第常生餓鬼中若憶念過去飢渴苦時則於諸有而生苦想斷一切緣務勤行精進得須陀洹果作是思惟我恒得諸比丘所須之物使我行道我今應當還求所須施諸比丘即行勸化時諸比丘而語之言汝先懶惰今以何故勤行教化時彼比丘即向諸比丘廣說上事以是事故知念生智憶念五百世事復有一比丘自憶念次第五百世生地獄中若憶念受地獄苦時舉

身毛孔血流而出汙身及衣日日詣水澡浴浣衣勤行精進得阿羅漢果更不澡浴浣衣時諸比丘而語之言汝常澡浴浣衣以水爲淨今何以不此比丘向諸比丘廣說上事如此憶念五百世事復有或憶念世界成時者曾聞有旃陀羅王名多羅儼佞善通呪術及諸論有子名奢頭羅顏貌端正當於爾時尊者舍利弗作婆羅門名弗伽羅婆羅善通皮陀及皮陀分經有女名波翹多時旃陀羅王住詣佛伽羅婆羅所而語之言可以汝女用妻我子時弗伽羅婆羅門便生瞋恚而語之言汝於四姓卑下我於四姓尊貴何緣以女用妻汝子時旃陀羅王語婆羅門言夫族姓尊卑無有常定汝頗曾聞誰造梵書耶婆羅門答曰我聞是瞿頻陀羅婆羅門所造復問

誰造怯盧吒書耶婆羅門答言我聞是怯盧吒仙人所造復問誰造此違陀及違陀分經而答之言皆是往昔大婆羅門等之所造作時旃陀羅言如是等往昔諸人皆是我身時婆羅門聞是語已心生歡喜便以己女而妻其子如此憶念世界成時事

經說佛告村主我自憶念九十一劫以來不曾爲飲食故起身口意惡業問曰佛爲以念前世智爲以自性念生智憶念此事若以念前世智知者何以念九十一劫而不多耶若以自性念生智知者何故但說憶念七世或五百世乃至憶念世界成時而不說憶念九十一劫者耶答曰應作是說佛以念前世智知問曰若然者何故但說九十一劫而不多耶尊者波奢說曰若說百劫亦生此疑但說

此不違法相復次九十一劫中有七佛出世故復次從此已來種相好業故復有說者以自性念生智知問曰若然者何故說自性念生智憶念七世若五百世乃至劫成時而不說九十一劫耶答曰餘人如此佛則多知問

曰自性念生智爲憶念中有時不答曰或有

說者不知所以者何中有微細非自性念生智境界故評曰應作是說憶念中之所以者何若不憶念者於前生則憶念少分不憶念少分

問曰菩薩前身時有自性念生智最後身時

爲有不耶若有者云何緣力勝因力耶若無者菩薩云何轉衰退耶答曰應作是說最後身有問曰若然者云何現在外緣力勝過去內因力耶答曰不以無外緣力故名爲內因

力乃以利根故名內因力菩薩於一切衆生根利最勝誰作是說菩薩最後身無外緣力耶淨居諸天爲現老病死苦亦因彌伽釋王女爲說讚涅槃偈如說

安樂以爲母 無憂以爲父 寂靜以爲妻
不久汝當得

見聞是事心生厭患然後出家過去諸佛亦爲菩薩說道具諸法如是等豈非外緣力耶復有說者最後身無問曰若然者云何菩薩轉衰退耶答曰菩薩雖無此智而有勝妙念

前世智願智

云何時心解脫云何不動心解脫問曰何故作此論答曰此是佛經佛經說佛告阿難比丘不應樂著聚集種種談議所以者何若樂著聚集種種談議欲求身證時心解脫不動

心解脫者無有是處若比丘不樂著聚集種
種談議欲求身證時心解脫不動心解脫者
斯有是處佛經雖作是說而不廣分別云何
是解脫體性云何得此解脫根犍度雖說得
是二解脫而不說此二解脫體性今欲說此
二解脫體性故而作此論復有說所以作論
京二解脫體性故而作此論復有說所以作論
者或說時心解脫是有漏非時心解脫是無
漏欲止如是說者意亦明此二解脫是無漏
故復有說所以作此論者或有說時心解脫
是有爲非時心解脫是無爲止如是說者
意亦明此二解脫是有爲故復有說所以作
論者或有說時心解脫是學非時心解脫是
無學所以者何時心解脫有所作故非時心
解脫無所作故爲止如是說者意亦明此二
解脫俱是無學故而作此論

一切有爲無爲法中一法是解脫體性有爲
法中是大地中解脫無爲法中是數滅大地
中解脫有二種謂染汙不染汙染汙者邪解
脫不染汙者是正解脫正解脫有二種謂有
漏無漏有漏者與不淨無量等相應者是也
無漏者學無學學者與苦法忍乃至金剛喻
定相應者是也無學者是阿羅漢阿羅漢有
二種謂時心解脫非時心解脫時心解脫者
五種阿羅漢非時心解脫者是一種阿羅漢
此二種阿羅漢離欲得無欲是心解脫離無
明是慧解脫問曰若離欲得無欲是心解脫
離無明是慧解脫者集法經說云何通如說
云何時心解脫答言是不貪善根對治於貪
云何非時心解脫答言是不癡善根對治於
癡如是解脫是善根性耶答言集法經文應

如是說云何時心解脫答言與不貪善根相應解脫是也云何非時心解脫答言與不癡善根相應解脫是也此文應如是說而不說者有何意耶答曰或有爲不貪故而斷貪心或有爲不癡故斷於癡心是故作如是說問

曰何故名時解脫答曰待時得故名時待時者待於六時六時者謂衣食曰具說法方人待衣者得好細軟衣則能得解脫不得則不得解脫待食者若得酥蜜肉等美食能得解脫不得則不得解脫待卧具者若得厚軟卧具能得解脫不得則不得解脫待說法者若聞善方便說法人所說則能得解脫不聞則不得解脫待方者若其方寂靜無諸亂鬧則能得解脫若不寂靜則不得解脫待人者若得善性易共住人同處者則能得解脫不得

京五

十四

則不得解脫何故名非時解脫耶答曰不待時而得解脫故名非時解脫不待時者不待六時謂衣食卧具說法方人等不待衣時者著糞掃衣能修善法勝時解脫者著價直百千兩衣不待食時者雖食下賤麤食而能修道勝時解脫者食百味食不待卧具時者坐於石上而能修道勝時解脫坐厚軟座上不待說法時者若聞無方便說法人所說則速入禪定不待方時者若其方多聲亂鬧則速入定不待人時者若得惡性難共住人而共同處則速入定復次狹小道得此法故名時解脫問曰何者是狹小道答曰或有於一身中種善根第二身成熟第三身得解脫若不以狹小道得者名非時解脫何者非狹小道或有於六十劫而修方便如尊者舍利弗或

有於百劫而修方便如辟支佛或有於三阿僧祇劫而修方便如佛世尊復次以劣弱道得故名時解脫何者是劣弱道於彼善法不數數修不常修不一切時修若於日初分修中分後分則不修若於初夜修中夜後夜則不修與上相違名非時解脫復次以多定道得故名時解脫以多慧道得故名非時解脫復次行者若爲適意不適意利益不利益苦樂所須具作障礙者名時解脫與上相違名非時解脫

時解脫是五種阿羅漢非時解脫是一種不動法阿羅漢問曰何故五種阿羅漢是時解脫答曰各有勝故五種阿羅漢是時解脫以人多故一種不動法阿羅漢是非時解脫合三乘道故亦有等義俱在無過清淨身中生

故復次以下人多故五種阿羅漢名時解脫以上人少故一種不動法阿羅漢名非時解脫如今世間王者大臣長者居士甚少卑下人甚多如是辟支佛得波羅密聲聞甚少時解脫阿羅漢甚多復次易得易起故五種阿羅漢是時解脫難得難起故一種不動法阿羅漢是非時解脫如今世人往師子王國及真丹國還者甚少若從此村至彼村還者甚多彼亦如是復次時解脫法不多用功不有所作而得故五種阿羅漢是時解脫非時解脫法多用功多有所作而得故一種不動法阿羅漢名非時解脫復次時解脫法有增有減故五種阿羅漢是時解脫增者是勝進減者是退非時解脫無增減故一種不動法阿羅漢是非時解脫無增者無勝進無減者無

退

阿毗曇毗婆沙論卷第七十六